

Բ Ղ Դ Է

Պ Ե Ր Ճ Պ Ռ Օ Շ Ե Ա Ն Ց Ի

Նուէր մեծ. բժշկապետ Յովհաննէս Գասպարեանցին.

(Ներունակութիւն 1)

ԺԱ.

Գ Ն Ձ Ո Ի Ն Ե Ր

Գնչուների ցեղերից երեքն են թափառում հայ աշխարհի գիւղերումը—հայ բօշէք (Գնչու), մթռուքներ և չինգեանէք, կամ զարաչիք: Թէ առաջինները հին ժամանակն ի՞նչ ծագում են ունեցել և ի՞նչ լեզու՝ իմ գործս չէ, բայց այժմ նրանք հայ են լեզուով և դաւանութիւնով, հայ են հագուստով և բարեհամբոյր ու խաղաղ բնաւորութիւնով:

Ախալքալաքի Մալկաչի գաղթական ժողովրդի լեզուն ու հագուստի տարազն ունին նրանք:

Բօշէքն են մատակարարում մեր աշխարհքին զատկութիւն քաղցր խմորեղէններ և թղթի նման բարակ ու սպիտակ կծկուծ լաւաշներ շինելու համար շարմաղ ալիւր (շաշիկ) մաղելու շարմաղի մաղեր, սովորական հաց թխելու. մաղեր, ցորենի միջից չը ծեծուած հասկերը մաքրող շատարարներ, բրինձ և այլ հացահատիկներ ու ընդեղէններ յստակող խախալներ, ցորենի քարերը ջոկող քար-

1) Տե՛ս «Մուրճ»-ի 1889 թ. № 12 և 1890 թ. № 1:

մաղներ և տներ շինելու հողմաղներ: Առաջին երկուսը շատ ճարտարարուեստութեամբ գործում են ձիու պոչի մաղից, կամ որ նոյն է՝ ձարից, մնացածը հիւսում են հորթի կաշուց քաշած բարակ փոկից:

Բօշէքանց ձեռագործներն են նոյնպէս ուռի բարակ և ճկուն ճղնիկներից հիւսած մերլաւաշ թիւելու յառափաթէքը, մերհաց գարսելու, մրգեղէն չորացնելու և գինու կարասների բերանը ծածկող սալաները:

Բօշէքանց վաստակն արդար է, աշխատում են և վարձ են ստանում:

Նրանք չ'ունին հաստատ բնակութիւն. վարում են թափառական կեանք և ամեն տեղ վայելում են ազգաբնակութեանց յարգանքն ու համակրանքը:

Թափառում են բօշէքը խմբովին՝ հինգ հինգ, վեց վեց գերդաստուն միասին, և ամենայն գիւղ ուրախութեամբ պատսպարում է նրանց իրանց դատարկ մարագներում:

Նրանց բարձրահասակ հաստ ու պինդ ընտիր իշանն են բառնում իրանց վերայ բոլոր ծանրութիւնը:

Իջնում են բօշաները մի գիւղում և գիւղը կենդանութիւն է ստանում:

Բօշի տղամարդը բինումը (կշիւան) նստած՝ գործում է մինչև երեկոյ մաղ ու խախալ, սալայ ու յառափաթայ. իսկ նորա կինն ու հարսը, կամ հէնց հասած աղջիկը, կոկիկ տրեխները հագին, մի մի երկայն հոնի մահակ ձեռքներին, շրջում են դռնէ դուռը և վաճառում են:

Արեն ու անձրեւը, թափառականութիւնն ու բաց օդը ծեծում են բօշի կնոջը, ներգործում են նորա կաշու և գծագրութեան վերայ, բայց անգոր են գտնուում խել նրանից նուրբ և սիրուն ու հաճոյական կերպարանքը:

Գտնուում են տգեղներ բօշի կանանց մէջ, բայց մեծամասնութիւնը գեղեցիկ և գրաւիչ է: Նրանց գլուխն ու երեսը, ներքին ծնօտի հետ բոլորուած՝ մի ձուածե շրջանակ են կազմում, որոնց միջին շարունակ խաղում են բօշի խաժակն աղջկայ կրակոտ, փայլփլուն և կենդանի աչքերը՝ բարակ, շիկագոյն, կամար յօնքերի

տակից: Ամբողջանում և լրանում է գեղեցկութեան կատարեալ տիպը, երբ համեստութեան հետ մի ամօթխած ժպիտ էլ խաղում է նորա բարակ և նուր շրթունքների վերայ:

Մտնում են ազատ համարձակ բռնի կանայքը գիւղացու տունը և իրանց ապրանքը փոխում են սովորաբար տեղական բերքերի հետ:

Բռնի կնոջ համար ոչ մի փակ դուռը չը կայ. նա վստահաբայլ յառաջ է գնում մինչև վերջին անկիւնը՝ եթէ տան տիրուհին բա-
կումը չի իրան դիմաւորում:

—Անանե՛ր (հոյքեր), բաջինե՛ր (խոյքեր), խաթունե՛ր, մաղ ա-
ռէ՛ք, խախալ առէ՛ք, սալալ առէ՛ք...

Ո՛չ միայն տան տէրը չի վշտանում բռնի կնոջ ազատ ներս մտնելու վերայ, այլ կատաղի շներն էլ անզոր են գտնուում արգելել նրանց մուտքը: Բռնի աղջիկը այնպէս յաջողակ է պտտեցնում մահակը և շրջանաձև դիժ կազմում ողի մէջ իւր շորս կողմը, որ գլխից ձեռք քաշած շունն էլ յետ է ընկրկում և ճանապարհ է տալիս:

Գնեցիր բռնի կնոջից ցանկացածդ ապրանքը կամ ոչ,—մի և նոյն է, դու նրանից չես ազատուիլ՝ մինչև նորա կողքից կախուած ոչ-
խարենի պարկի մէջ ժողոված հացերի վերայ մի կտոր չ'աւելացնես:

Ահա՛ մի ատելի յատկութիւն, որով բռնան ընդհանրապէս զա-
նազանուում է իւր նստկան կեանք վարող հայ եղբօրից:

—Բռնի երես ունիս, ասում են մեզանում պնդերես մարդին:

Սխալ համեմատութիւն չէ այս, հայհոյի՛ր, անարգի՛ր, հրի՛ր, կռնիցը բռնի՛ր դուրս ձգիր,—բռնի կինը քո տանից դուրս չի դնիլ ոտքը, մինչև մի բարիք դուրս չը տանի. իսկ այդ բարիքներից առաջինը և բռնի կնոջ ղլխաւոր օգտուելու առարկան հացն է:

Հազար կրկնի՛ր, երդուի՛ր, հաւատացրո՛ւ, թէ տանը թխած հաց չը կայ, թէ վաղը հաց պէտք է թխենք, վաղն արի տար՝ անհնար է, բռնի կինը երեսը դէմ կը տայ և թովչի լեզու կը թափի, մինչև մի բան դուրս խլի:

—Աստուծոն ամանաթ եղնի՛ս (աւանդ), մանչերուդ խէրը տես-
նես, Նուսաւորչու լուսէն բաժին առնես, արեւուդ սաղաղէն (կեանք
«իքես»), բռնին բաժինը տո՛ւր, մի՛ կտրիր:

—Մի մաղ տուի՛ր, երկու մաղ ալիւր ստացար, տա՛ր հաց թխի՛ր
ու կե՛ր, ստիպուում ես ասել բռնի կնոջը:

— Բօշան հաց չի ըններ, ջանի՛կս, բօշի ձեռքը խմորին չի կպչիր։ Նա սուտ չի ասում։ Հաւանական է, որ շարունակ թափառակա- նութիւնը խլել է բօշայից հաց թխելու սովորութիւնը և այս դար- ձել է նրանց համար աւանդական նուիրագործուած սովորութիւն։

Մահու չափ յանցանք է բօշի կնոջ համար ձեռքը խմորին դիպցնելը. ամենածանր անէծքը, որ բօշի կինը տալիս է իւր դըս- տերը, այդ խմոր անելու դատապարտելն է նրան։

— Քեզի տեսնիմ՝ սե առիքին (տառապաղ) տակը ծածկուե՛ս, ջուխտ ձեռքով խմոր էնե՛ս։

Յայտնի է, որ հացատուէնների առաստաղը թոնրի մխից մշտա- սե է. իսկ խմորը շաղախուում և թխուում է սե առիքի կամ ա- ռաստաղի տակ։

Ամենասիրելի գրաստը բօշայի համար, ինչպէս ասացինք, հեզ էջն է, միակ չորքոտանին է, որ նորա հարստութիւնն է կազմում, նորա գգուանքի առարկան է, նորա երեխաների ուրախութիւնն է։

Կով, եզ, ոչխար, այծ հօտերով առաջարկի՛ր բօշային, նա եօթն օրէն ճանապարհ հեռու կը փախչի, դրանով դու նորա ընտանեկան պատիւը կ'արատաւորես, նրան կը վիրաւորես։ Նա ինքն իւր սրտի վիշտը դէպի իրան ցաւացնող, ստահակ, անհնազանդ զաւակը հե- տեւեալ կծու անէծքովն է դուրս վիժում իւր նեղացած սրտից։

— Քեզի տեսնիմ, օղով (օրդի), հօ՛-հօ՛ էնես, չո՛ւ-չո՛ւ չ'էնես, քուռօյի (իշի) ձէն չը լսես, սե մաքու զառը գրկես, անպէս իմա- նաս, թէ սե իշուն սփան է (իշի քուռօյի)։

Հօ-հօ հնչումով սովորաբար քշում են կով ու եղանը, իսկ չո՛ւ- չո՛ւ ձայնով վարում են իշին։ Բօշէն անիծում է իւր որդուն, որ նա երբէք իւր կեանքի մէջ չ'արժանանայ էշ քշելու, իշի զուոց լսելու և իշի ձագ գրկելու։ Այս անէծքով նա իշին աւաւել գերա- ղանցութիւն է տալիս զառնից։

Այսչափը չեն, որով բօշէքը խոստովանում են իշանց առաւե- լութիւնը ուրիշ գրաստներից. շատ ասացուածքներ ու աւանդու- թիւններ ծածկում են նրանք բօշայական շրջանից դուրս գտնուած արտաքին աշխարհից։

Հետաքրքիր են նոյնպէս բօշէքանց հարսանիքների, մահենիք- ների, հասարակական ճաշերի և այլ ծէսերի նկարագիրները՝ երգերով

և գործով կատարուած: Ափսո՛ս, որ իսպառ կորչելու է անյայտութեան մէջ: Վախենալով չ'ենթարկուել ծաղրի ու կատականքների այն ժողովրդականներից, որոնց մէջ իրանք կատարում են այդ ծէսերը, բռնէք աշխատում են փախուստ տալ պապենի աւանդութիւնից. այժմ նրանք ոչ միայն դադար են առել կատարելուց, այլ և մերժում են այդպիսի սովորութիւնների և երգերի գոյութիւնն իրանց մէջ:

Բռնէք սովորութիւն են ունեցել պսակուած երեկոյին նորափեսային նստեցնել սառւթոցի մէջ. նստում էր փեսան և չէր դուրս գալիս թոնրից, մինչև որ նորահարսը մի երկար ու ձիգ երգով խոստումն չ'անէր տունէ տուն թափառիլ, վաստակել, մուրալ, անարգանքներ կրել, երեսը սեացնել, բերել և նրան պահել ու մոռցանել: Բանաստեղծական բարձր հանճարի ծնունդ կարելի էր համարել այդ երգուածքը, եթէ հնար լինէր ձեռք բերել:

Ոչինչ խոստումներ և բարիք իմ կողմից չը հրապուրեցին բոշայի պառաւին՝ նորից թելադրել ինձ իւր ուրախ տրամադրութեան վայրկենական ազդեցութեան ներքոյ երգածը գրի առնելու համար:

Բոշայի կինն իւր գլուխն սպանում էր. նա լեզու հանած աղաչում էր ինձ՝ իբրև ամենագաղտնի խոստովանութիւն պահել իւր չիմարական լեզուազարութիւնը:

Բոլորովին նման չեն հայ բռնէքանցը հայ աշխարհի թափառաշրջիկ գնչուների միւս երկու ցեղերը—չինգեանաները և մ'թռուբ, կամ դարաչիները:

Ձինգեանները մահմեդական շիա դաւանութեանը պատկանող մի ցեղ են, որոնց գործածական լեզուն և հագուստը վերցրած է Հաղիրբէջանի թաթարներից: Աղտոտ են նրանք, աներես են, գող են, բայց մի որոշ չափով. նրանց պարապմունքը մաղ ու խախալ ծախելն է. սիրում են նոյնպէս և բարակ շներով որս անել: Աղուէսներ, կուզներ և մասամբ գալլեր, էժան գնով ձմեռները կարելի է նրանցից առնել: Շրջում են նոքա գլխաւորապէս թուրքերի գիւղերումը. հայերի մէջ մի տեսակ խորթութեամբ են ներս սողում:

Ձինգեանի կնոջ գլխաւոր շաւահէտ եկամուտներից մինն է՝ բարեբաղդ գուշակութիւններով հայ կանանցը խաբելը. նրանք գուշակում են առաւելապէս եղունգի վերայ և գաւաթի մէջ լցրած ջրին նայելով:

Զինգեանաներն իրանց հետ տանում են սև այծի մազից գործած մի վրան, որի տակին նստելը մի և նոյնն է, թէ բաց օդումը. ամեն կողմից փչում է, անձրեն էլ շռչռալով ներս է վազում:

Ամենից անպատիւ, աներես, անհասկացող, թուրք և հայ ձանձրացնող, բոլորից արհամարհուած ու անարգուածները՝ զարաշի կամ մ թռռաբ առուած ցեղն է:

Ի՞նչ կրօն են դաւանում սրանք, ի՞նչ նախնական ծէս ու աւանդութիւն ունին—իրանք էլ չը գիտեն. աւելի հաւանական է, թէ սիւննի աղանդին յարուած լինին, բայց և ոչ երբէք չեն մտածում կրօնի վերայ. խօսում են մի տեսակ քրդերէն և պարսկերէն լեզուների խառնուրդով:

Սրանք դառն աղքատ են, ծոյլ են, գործել չեն սիրում և միայն մուրացկանութեամբ են քարշ գալիս:

Զգուելի է զարաշու տեսքը, գործքը, չափազանց աներեսութիւնը, անասելի աղտոտութիւնը, նիստ ու կացը և վարք ու բարքը: Մարդկութեան խոզերն են իրանց կեղտոտութիւնով այս ատելի, մերկանդամ թափառաշրջիկները. ընտանիք, տուն, կահ կարասիք, անօթեղէններ ի՞նչ է,—չը դիտեն. աղբանոցներից ժողոված հնոտիների կտորներ առանց, գոնէ, սառը ջրի մէջ լուանալու, հաստ մախաթով միմեանց կպցրած՝ փակում է չափահասների մերկ փորտիքը և մէջքը. կին է, մարդ է, աղջիկ է, նորահարս է, երիտասարդ է, թէ ծեր է՝ հաւասարապէս կիսամերկ են, ձեռք ու կռներ, սրունք ու անդամներ, կուրծք ու գլուխ անպատկառաբար բաց են. մանուկները հօ՛ երկու սեռն էլ միանգամայն մերկանդամ են: Այս ամենը, ի հարկէ, մեզ համար է անպատկառութիւն, նրանք ամօթխածութեան վերայ գաղափար անգամ չ'ունին:

Մի աղտոտ փալասի մէջ պարանոցովը կապած, լանջի վերայ ճնշելով՝ քարշ է ածում իւր հետ ստնդու մայրն իւր երեխային: Զմբած, ցամաքած, ածխի նման սևացած ստինքը տալիս է մարդակերպ փոքրիկ լամուկի բերանն ու աչքը շլացրած, մէջքը կղացրած, ոտքը կաղալով, ուժահատ, կիսամեռ հիւանդի դալկացած դէմքով, ձեռքի երկար մահակով շների հետ կռիւ տալով, ձախ ձեռքով մի ուրիշ մերկ երեխայ ևս քարշ ածելով գիւղերի փողոցներում ճանապարհներին հանդիպողին ձեռք է պարզում զարաշու կինը:

Մարդ չը կայ, որ նրանց չ'անարգէ, չը հայհոյէ, չը հալածէ. մարդասէր գեղջուկ հայ կանայքը, որոնց համար աղքատից երես թեքելը մահացու յանցանք է, որոնց ողորմածութեան պատուիրանն է՝ «տուր ոսկի գօտին, մի՛ քննիլ», որոնց համար ամեն աղքատ ու տնանկ, ինչ ազգ ու լեզուից կ'ուզէ՝ թող լինի, Աստուծոյ աղքատն է, այսպիսի խնամագութ կանայքն անգամ շատ յաճախ զգուանքով դուրս են անում զարաչու կնոջը, զարաչու մարդուն, զարաչու մանուկին:

— Մայրի՛կ, աղքատ է եկել, ի՛նչ տամ, հարցնում է կարեկցելով դուստրը:

— Ամա՛ն, ամա՛ն, դուրս արա՛, ներս մի՛ թողնիր, մթռուր է, զգուշացի՛ր, աչքի սուրմա կը թռցնի, դրանց մեծ ու փոքրը բոլորը գող են:

Անուշադիր է մթռուրը տանտիրոջ արհամարհանքին. նա ճրկուում է, ոլոր մոլոր է գալիս, հաշմ ու արատաւորի դիրք է ստանում, երեսի կնճիռները թշուառի է նմանեցնում ու ողորմութիւն է հայցում:

Քրիստոս, մէր-Մայրամիս են հայ գիւղերումը նորա մաղթանաց առարկաները, խաչակնքելն է գութ զարթացնող զէնքը. իսկ պարսկին պատահելուս՝ մահմեդական գիւղերում՝ Փէյզամբարը, հազարաթի Ալին, Հասան Հիւսէյններն են նրան օգնութիւն հասնողը:

— Մայր՛իկ, ինչ անում եմ, չեմ անում՝ զարաչու կնիկը չի գնում, գանգաւորում է գիւղացու աղջիկը:

— Աղջի՛, թող մնայ, լաւ միտքս ընկաւ, գամ քեզ համար վիճակ բաց անել տամ, ձայն է տալիս ներսից դստեր ապագայ բաղդով հետաքրքիր մայրը:

Այդքան բաւ էր մթռուրի կնոջ համար. նա տեղն ու տեղը ծանր նստեց չոր գետնի վերայ և սկսեց գովել խորոտիկ աղջկայ զարաղաշ (բիւյոն) աչքերը, բերանը, քիթը, քայլքը և ամեն ինչը:

Սիրուն օրիորդի քիմքը քաղցրացաւ զարաչու կնոջ հաճոյախօսութիւնից. մօր բազմապատիկ զգուշական խօսքերը նա մոռացաւ, տուն մուտ, գողը լիքը դուրս բերեց հաց, ալիւր և մթռուրի կնոջ պարկը լցրեց:

Այս գուշակութեան վճարքը չէ, այն փողով պէտք է լինի, ապա թէ ոչ՝ Ֆալը չի խօսիլ (գուշակութեանը չի երազործուիլ):

Ահա ստացաւ մթռուբի կինը զաւակասէր մօրից մի երկու կուպէկ և սկսեց անխնայ շուայլել սիրուն աղջկայ առաջին ամենայն բարիք:

— Սպիտակ նժուգի վերայ, աստղերի տակ թռցնելով՝ նստած է ընչացքը նոր ծլած փեսացուն՝ ձեռքերը ոսկու և արծաթի մէջ. նա գալիս է իւր բաղդի ոտքը. վազուց նա օդը ծղելով թռած, յափըշտակած կը լինէր իւր գողտրիկ որսը, բայց մի մեծ անհուն անդունդ նորա առաջին բացուած է, մի երկնամբարձ սար ճանապարհ չի տալիս նրան. իսկ այդ վիհն ու լեռը ոչ ոք են, եթէ ոչ քանի մի ուրիշ կտրիճներ, որոնք նախանձելով երիտասարդի բազդաւորութեանը, իրանք են ուղում անմահական խնձորին տիրանալ:

— Օ՛հ, ի՛նչ երջանիկ ես, խորոտ-մորոտ աղջիկ, գլուխդ լուանալու սանտրի հետ իջած քո մի հատ մազը աներևութաբար մօտդ կանգնած խատուտիկ աղանու ոտքն է փաթաթուել. աղանին բաղդ բաժանող հուրիների հրամանակատարն է. նա պարզ երկնքի վերայից թեթեւ հողմին է յանձնել մազդ. հոյն երկար ժամանակ իւր թեթի վերայ տարուբերել է անուշ քնով քնած սիրաբորբոք երիտասարդների գլխավերեւը. շատերի միջից միայն քո ճակատի գրուածն է դուր եկել իւր քաղցր ու սիրուն պատկերով հեղասիւզ հովիկին և նա վաչր է ձգել մազդ ջահէլ տղամարդի աչքերի վերայ, երբ նա անոյշ երազներով հարբած՝ մրափած է եղել քնի մէջ: Մազդ խտողեցրել է երիտասարդի աչքերը. նա ձեռքը տարել և վերցրել է երկար ու փափուկ կանացի մազը: Այդ մազ չէր, այդ Ջաֆար աղի ճօճիւն տէգի սուր ծայրն էր, որ ցցուեց հուրիների սիրելի քաջ իգիթի սիրտը, չը վիրաւորեց, արիւն չը դուրս բերեց, այլ կրակ դառաւ, վառեց նրան. — Եթէր սարի ետեւը լինիս, եթէր թերթ երկինքը բարձրացած լինիս, եթէր տակ գետինքը մտած լինիս, ուր որ կաս, որտեղ գտնուում ես, դու ի՛մն ես, իմ ձեռիցը չես պրծնիլ, ասաց սիրեկանդ ու թուրը մէջքը կապեց, նժուգի քամակն ընկաւ: Խեղճ տղայ, ի՛նչ դժուար տեղն է. քամին ուրիշ սիրակէզ երիտասարդների քիթն էլ է մտել, նրանք բոլորը զարթնել են, հոտով իմացել են մազի տեղը, եարիդ (սիրահար) առաջը կտրել են և հուրիների պարգևին տիրանալ են ուղում: Ա՛յ, ա՛յ, ա՛յ, ո՛ւՖՖ, Արարիչ Աստուած, դու ազատես, էս ի՛նչ եմ տեսնում

եղունգիս ծայրին, սո՛ւր, կռի՛ւ, արի՛ւն, բրդո՛ց, կոտորո՛ց. բոլորն իրար են խառնուել. հարիւրը մէկի վերայ են յարձակուել:

—«Ո՛ւհ... փակում է ղարաչին աչքերը և ցնցողական շարժումներ անում. նայեցէ՛ք, լաւ մտիկ տուէ՛ք, գաւաթի ջուրն ա-րիւն դառաւ, չէ՞ք տեսնում»:

Ղարաչին մօր ու աղջկայ ուշադրութիւնը հրաւիրում է դէպի գաւաթի ջուրը:

—Ուշինչ չի երեւում, յայտնում է մայրը. իսկ խեղճ աղջիկը, ցանկանալ ևս, հնարաւորութիւն չ'ունի տեսնելու. նորա աչքերը արտասուներով լցուած՝ մթնակալել են. եթէ ամօթխածութիւնը արգելք չը լինէր, վաղուց նա երեխայի նման լալիս կը լինէր:

—Մի՛ ցաւացնի գեղեցիկ աչքերդ, աննման աղջիկ, աչքի կոպով աղջկայ այլալմուռնքը տեսնելով՝ ասում է ղարաչին. մտի՛կ տուր, հուրինները քեզ սիրել են. «ահա ոտնատակ տուեց քո սիրահարդ բոլոր միւս երկչոտ մկներին, նրանցից շատերին կոտորեց, գետնին փռեց, քնացողներին էլ փախցրեց և իջաւ ձիուցը, պարզ աղբրի ական վերայ կռացած՝ լուանում է արիւնոտ սուրը. ահա՛ նա կրկին թռաւ հրեղէն ձիու արծաթապատ թամբի մէջ, պատրաստ կա՛ց, նազելի աղջիկ, այսօր է՛ նա կը գայ, վազն է՛ քեզ կը ճկի իւր ու-ժեղ կռների մէջ»:

—«Ի՛նչ ես գոյն տալիս, գոյն առնում, սիրունի՛կ, ժպտալով խրախուսում է ղարաչին, չը լինի՞ վախում ես նորա տղամարդի խոժու դէմքից. նորա առնական հսկայ մարմնի մէջ թագ է կացած մի քնքոյշ սիրտ, սէրը իւր գահը դրել է կտրիճի սրտի մէջ. այդ սէրը ապրում է, շնչում է քեզ համար ու քեզանով. —Դու ինքդ ես այն սէրը»:

Արշալուսին թերթիկները արձակող կիսաբաց կոկոն վարդի թարմ կարմրութիւնից աւելացաւ պարկեշտ կուսի կարմրութիւնը: Նա համեստօրէն ցած թողեց իւր նազիկ աչքերը և նորա կուրծքը սկսաւ մեղմ և պարզորակ լճակի երեսին խաղացող հեզասահ ղեփիւռից պատճառած ծածանումի նման ել և էջ առնել:

Մթռուբի կիներ հասաւ իւր նպատակին: Օրիորդից ոչ պակաս

ցնծաց որգեսէր մայրը. նա հրամայեց աղջկանը մի հաց ևս վերադիր պարգև տալ բաղդ գուշակողին:

— Նանա Մէյրամը (հայր Ասորո-ած-ածին) քեզ բաշխի այս թառլան ղուշը (էֆլէ), բաջի՛, օգուտ է քաղում յարմար դէպքից զարաչին, մի հինշ ապիկ, կամ վարտիկ տուր իմ այս երեխային, հիւանդ է, մրսում է. մի կտոր էլ պանիր, միս, ձու, ինչ որ քո քաղցր սրտից բղխի՝ տուր, մի՛ խնայիր, որք է, հայր չ'ունի, հինգ օր չը կայ՝ հօրը թաղեցինք:

Ղարաչու կինը հաստատ հաւատացած էր, որ մի երկու բան ղուրս պէտք է տանի այս տանից. և չը սխալուեց:

Մեղաւոր չէր գիւղացի հայ մայրը. մթուռբի կինն այնպիսի վստահութեամբ և վարժ է ապագան առաջիդ բաց անում, այնքան ճարտար և կենդանի է նկարագրում և այնպիսի կոկու ողորկ ոճով, որ ո՛վ ասես՝ կը հաւատայ. իսկ բոլոր գուշակութիւնը կատարուում է տեղական թուրքերէն լեզուով, ապա թէ ոչ, մթուռները հայերէն շատ քիչ են խօսում՝ այն էլ աղճատեալ ալաշկերտցու բարբառով:

Այդ մթուռների կանայքն են, որոնց դիմում է շատ անգամ գիւղացին՝ իւր կորուստը գտնելու համար:

Մի յուսալի երկդիմի պատասխան տալիս է միամիտ նախապաշարեալին զարաչին և իւր հասոյթն ստանում:

Մթուռները, սովորաբար, իջնում են գիւղերից շատ հեռու, ճանապարհների վերայ, ջրին մօտիկ: Զինգեանի վրանների նման մի կիսամաշ ծածկոց էլ սրանք ունին:

Բաւական է, եթէ մի մաքուր հագնուած ձիաւոր, կամ փոստով գնացող մի ճանապարհորդ տեսնեն մթուռները: Առանց ժամանակ կորցնելու՝ մօր մի ակնարկից հասկացան և ղուրս թափուեցան վրաններից մթուռբի երեխայքը շների հետ միասին: Վազում են նրանք ամենայն զօրութեամբ. նրանց աղաչական ձայները կորչում են վտիտ և ազաղուն շների նուազ հաչոցի մէջ. հեռզհետէ շները յոգնում են, էլ չեն ընկնում ճանապարհորդի քամակից, դադարում են հաչելուց, իսկ ժիր մանուկները մի քանի հարիւր քայլ հետևում են թռչող սալակին կամ սրընթաց ձիաւորին:

Նրանց շունչը կտրուում է, ձայները փորն է ընկնում և միայն

մի խուլ մրմռոց լսուում է ձեռքերը պարզած ողորմութիւն հայցող մանուկների վոհմակից:

Կաց ու զուարճացի՛ր, եթէ ճանապարհորդը խղճաց և մի կուպէկ շարտեց ձանձրալի մուրացկաններին:

Ականջներդ փակի՛ր, որ չը լսես նրանց բերանից դուրս թափուած միմեանց ուղղած անգրելի հայհոյանքները. կուպէկը ձեռքից ձեռք անցաւ, ծեծ ու ջարդ, երես ծուլատել, խռպոտ և կերկերաձայն աղաղակներ, նզովք, անէծք իրար է խառնուել:

Վերջապէս մի աւելի ճարպիկը փախցրեց փողը, իւր մօրը տուեց և խաղաղութիւնը տիրեց:

Ահա՛ հէնց այս շինգեանաների մէջ նշանաւոր Ֆաթմա պառաւի մօտ էր գնում մեր բաղդախնդիր Բղդէն:

Նա մտաւ վրանի տակը:

ԺԲ.

ԱՄԵՆԱԿԷՏ ԵՂՈՒՆԳ

—«Մի բուռն աւազին թիւ ու համար կայ, դեղին շողշողուն իշամեղունները նրանցից շատ են, բզզոցը ականջին դուրեկան է, տուածը սրտի ուրախութիւն է. դառը քրտնքի բերած կուպէկը ուղտի պոչ է՝ չի երկարիլ. իշամեղուն թող քեղ կծի, թաք ըլնի դու նորա արիւնը ծծի. սև փողը սև օրին բանացրո՛ւ, դեղին ոսկով սարեր դարձրո՛ւ. ի՛նչ ես հարցնում՝ ո՛վ է, տրորի՛ր վրոջն անցկացի՛ր՝ թէկուղ անտակ ծով է. իգիթ մարդի մի ձեռը եղումն է, մինը մեղրումը: Սև իշով գնացած ճանապարհը կարճ. կը լինի. Քեօռօղլուի ամպերում թռչկոտող դռաթը կատարեալ արծիւ է, որ կայ. որտեղ հասար՝ ճանգերիդ մէջն ա՛ռ, ծուիկ ծուիկ արա՛, սիրտը քրքրի՛, փետուրն աշխարհքով մին արա՛. ոյժը քոնն է, ոչ ով չի համարձակիլ ասել, թէ աչքիդ վերեն յօնք կայ. իշամեղուն շատ զօրեղ է, ինքը փոքր է, բայց խթանը ջուհարդար պողպատից սուր է»:

—Սիրուն աղջիկն ուրիշի ապրանք է, բայց ուզեցար՝ քոնը կը լինի. մէկ երկու պսպղան օսկով գլխին տուի՛ր՝ հասած ծիրան է կը կաթի, բուռդ կ'ընկնի. ճաշակովդ չէ՝ ճխլի՛ր ու շարտի՛ր, ուրիշ ծառերի վերայ շատ կան:

— Երակը լափեց շէներ ու տներ՝ կրակ տուողի սի՛րսն ընչիցաւի, ձիդ քշի՛ր վրայովն անցկացի՛ր, իշամեղուն բուռն արա՛ քցի՛ր, ո՛չ մտածիր, ո՛չ հոգս քաշիր....

— Փա՛հ, փա՛հ, փա՛հ, փա՛հ, հեղեղատի ջուրը վարարել է, սարեր է պատռում, քար ու թումբ է քանդում, ամեն բան կուլ է տալիս... Է՛... Է՛... Է՛... Է՛հ, ափսո՛ս, ջուրը նստում է, սարերի ձիւները հալուեցին....

— Դէ՛ հերիք է, աշխարհքումն ի՛նչն է յաւիտենական, ասաց և աչքը բուլթ մատի եղունգից հեռացրեց զարաշի ծաթման։

Վերեւ անկապ ու անհասկանալի երկդիմի խօսքերը սազի ու քեամանչի ներդաշնակ նուագից առաւել քաղցր հնչեցին կօլոտ չարչու համար։ Նա շատ լաւ հասկանում էր զարաշու կնոջ խօսքերը։

Ճաթմէն ֆալ էր բաց անում, զարաշու պառաւը Բղդէի բաղդն էր զուշակում։ չինգեանէն եղունգին նայող էր։

Բղդէն երկու կոպէկանոցով երեք անգամ խփել էր զարաշու պառաւի եղունգին ու սև փողը բուռը դրել, դրամը յետ էր զցել եղունգի գաղտնիքը ծածկող հաստ վարագոյրը, բացել էր պառաւի աչքերը և նա յայտնապէս կարդացել էր Բղդէի երեսին իւր ապագայ վիճակը։

— Բերանիդ մեռնե՛մ, բերանի՛դ, սրտի ուրախ փղձկանքն արտայայտեց Բղդէն և ձեռքը դրպանը տարաւ, մի երեք կոպէկանոց էլ պարգև տուեց ֆալչի կնոջը։

— Թէ Աստուած կը տայ, ասածներիդ կէսն անգամ կը կատարուին՝ զլուխդ ոսկու մէջ կը թաղեմ, — լիասիրտ խոստումն արաւ նա և տեղիցը վեր կացաւ։

ԺԳ.

Ի Շ Ա Մ Ե Ղ Ո Ւ Ն Ե Ր Ը

Շատ ուշ գլխի ընկաւ կօլոտ Բղդէն։ Նա կանգնել էր Կարբու Կիզի-մատուռի զանգակատան մէջ, ապուշի նման բերանը բաց՝ ինքնամոռացութեամբ աչքը չէր հեռացնում զանգակատան լուսամտի քարի ճեղքից։

րա աչքի առաջին կատարուում էր մի նորանշան երևութ և այնքան անսպասելի արագութեամբ, որ նա ժամանակ չ'ունեցաւ արտասովոր դէպքը ծանր ու թեթեւ անելու:

Ասեմ, թէ ի՞նչ պատահեցաւ:

Այս անցքից մի քանի օր յառաջ Բղդէն գնացել էր Երևան՝ ապրանք գնելու:

Շատ ժամանակ չէր, որ նա իւր գործը կապել էր Երևանի հետ: Զհուռ Աղաջանից նա ձեռք քաշեց այն օրը, որ առաջին անգամն Աղաջանը սկսեց հայրաքար յանդիմանութիւն կարգալ նորա երեսին:

—Ամեն տեղից գանգատներ են հասնում ականջիս, նախատեց Աղաջանը. ասում են, որ դու ձեռք կարճ, աղքատ մարդի երեխէքանց բերանի հացն ես կտրում, նրանց տակի վերջին փալասն ես դուրս քաշում, մէկին երկու տոկոս ես առնում, մի շահու ապառիկն երեք անգամ աւելի ես նշանակում, քո ընկեր չարչիներին փնաս ես տալիս, քաղցր լեզուով մոռտարու աչքն ես ջմռնում, վերջը տակը ջուր կապում. իրա՞ւ է այս բաները:

—Հապա՛ ես ո՞ւմ հօրն եմ պարտական, որ մինչև երեկոյ ոտքեր մաշեմ, տանջուիմ, չարչարուիմ ու աշխատանքս պատահողի փորը կոխեմ:

—Քչով բաւականացի՛ր:

—Աղբանոցներումն եմ գտե՞լ, թէ տուած ապրանքիդ փողը չես ստանում, յանգզնաբար պատասխանեց Բղդէն Աղաջանին:

—Բայց ես քեզ խեղդո՞ւմ եմ, անխիղճ կերպով եմ հետդ վարուում, կրկնապատիկ օգո՞ւտ եմ ստանում:

—Շահ չ'ունենաս ընչի՞ կը տաս, գանձ հօ՛ չե՞ս գտել, հողի տակիցը հօ չե՞ս հանել. արդար վաստակով ո՞վ է հարստացել, որ դու մի կապոց հասարակ կտաւով ջհուռութիւն անէիր, էնքան վաստակէիր, որ էս ծովի պէս խանութը բաց անէիր ու չարչիք շինէիր, աշխարհքը տարածէիր. ի հարկէ դու էլ նեղել ես, հարըստահարել ես, մէկին հինգ զրեւ ես, տներ ես քանդել, էս օրին հասել, որ Կարբու մէջ բոլորը գլորուեցին, դու ոչինչ տեղից յառաջ եկար. մոի՛կ տուր էսքան հին խօջաներին, որոնք Բայազիդումն անքուն ցեցերի, անթիւ հարստութեան տէր են եղել, հետները բե-

րած կայանքը թիով է քերուել ու էս օր վերջին շունչներն է կոկորդումը տրըփում, քթերը բռնես՝ քաղցածութիւնից հոգիները կը տան, ամեն մէկի խանութումը քո մի օր ծախածի չափ ապրանք չը կայ. էս ի՞նչպէս եղաւ, դու նրանցից շատ խելօք ես:

—Տօ՛, ապերախտ ու անաղուհաց քրդի շո՛ւն, բարկացաւ ջհուտ Աղաջանը, իմ տնկած ծառերի մէկն էլ դու ես, ոչ բարով իմ չրաղն ես, քեզ մի օր նեղացրե՞լ եմ:

—Իմ աչքը ծակում է, որ ուր գնում եմ, քո լաւութեան վերայ են խօսում, քո լիքը խանութն են գովում, քեզ են երկինք բարձրացնում. լեղի է իմ կերածն ու խմածը, եթէ քեզ գլխի վերայ չը կործանեմ, հողի հետ չը հաւասարացնեմ ու մէն միայն Կարբու գաւառումը մատով ցոյց տալու չը դառնամ:

—Յձի ձագ եմ տաքացրած եղել ծոցումս, որ ուրիշներին կծելուց յետոյ՝ ինձ էլ խալթի, դո՛ւրս, անպիտան, ճշաց ջհուտ Աղաջանը և հանեց իւր արկղի միջից Բղդէի հիմնադրամ նշանաւոր տասը չուրուկ կոպէկը ու քսակով շարտեց փողոց:

—Ես Սալբու տղայ կօլոտ Բղդէն չեմ, եթէ ասածս չը կատարեմ, ասաց դառն և կծու ժպիտով ու աներես անպատկառութեամբ և շտապ քայլերով դուրս ընկաւ, վերցրեց իւր քսակն ու աներևութացաւ:

Այդ օրից էր ահա, որ Բղդէն կտրուել էր Աղաջանից և ամիսը մի անգամ Երեւան էր գնում ապրանք բերելու. այդ օրից սկսած՝ Բղդէն աւելացրել էր իւր ագահութիւնը, կրկնապատկել և եռապատկել էր ընչաքաղցութիւնը. ամենատեսակ միջոցներ՝ ներելի և աններելի՝ չէր խնայում հարստանալու և իւր բարեբարին կործանելու. —գափում էր, գջլում էր, տեղն ընկած ժամանակը գողանում էր, բաց աչքը միշտ անկուշտ էր, ախ էր քաշում ու ծուխը քթիցը չէր դուրս գալիս. այս մանր ու աննշան հնարքները բաւական չէին իւր նպատակներն իրագործելու համար:

Ի՞նչ անէր ուրեմն. ի ցաւ իւր սրտի՝ նորա յայտնի հակառակորդը, քանի գնում է, ընդլայնում է իւր առևտուրը. բաւական չէին նորա ստեղծած չարչիքը, որոնք Բղդէի աչքի փուշն էին, մի օր էլ յանկարծ Կարբու նախկին հարուստ և այժմ ընկած տներից մէկին՝ Բատինենց Կարապետին, որը մշակութեան և երկրագործու-

Թեան անսովոր լինելով՝ դուռն երեսին ծածկած էր մնացել, մեր բարեսիրտ ջհուտ Աղաջանը հրաւիրեց քաղցրութեամբ իւր խանութը, խոստացաւ զրամագլուխ և խորհուրդ տուեց Աշտարակումը մի խանութ բաց անել, կտաւեղէն և մանրունք ծախել:

Այս էլ հերիք չէր. ջհուտ Աղաջանն առաջարկեց իւր մի հաւիկ ազջիկը Կարապետի որդի Սահակին, որին, տեղական սովորութեան համաձայն ՍՏօ կրճատեալ անունով էին կոչում:

— Հիմի՛, որ հացիս կէսը պակասեց, Աշտարակն էր իմ գլխաւոր առևտրի կենդրոնատեղին, եթէ այնտեղ խանութ բացուեց, էլ ո՛վ ինձ պէս մի չարչուց ապրանք կ'առնի, մտածեց Բղդէն և խսպառքիչ մնաց խելքը կորցնում էր:

Ահա այս հանգամանքներն էին, որ նրան ֆալսի ֆաթմայի դուռն ուխտ ուղարկեցին, այս ձեռնարկութիւններն էին, որ նորա ոտքը Աղաջանի խանութից կտրեցին և երեսն Երևան դարձրին:

Ահա գնել էր Բղդէն Երևանից կարևոր ապրանք և բօշի աղին բարձած՝ յետ էր դառնում, երբ Կարբուց Երևան փոխուած իւր հայրենակից մի վաճառական նրան կանգնացրեց և իւր հետ խօսող ուրիշ անձանցիկին ասաց.

— Ամեն օր Կարբի գնացող էիր հարցնում, այս չարչին մեր Սալբու տղայ Բղդէն է, սա է Կարբու անդրանիկ ծնունդը, հիմի տուն է գնում, ինչ ասելու ես՝ սրան ասա՛, սա կը կատարի:

— Եթէ այդպէս է, մի լաւութիւն արած կը լինես, Բղդէ եղբայր, ասաց նրան անձանցիկը, եթէ այս թուղթը տանես և դնես ձեր եկեղեցու Կիզի-մատուռ կոչուած զանգակատան լուսամտի վերայ:

Անձանցիկը հանեց գլխարկի միջից մի թուղթ՝ եռանկիւնի ծալած և տուեց Բղդէին:

— Անցեալ տարի ես Սպահանումն էի, պատմեց անձանցիկը, մի սպահանցի հայ, երբ իմացաւ, թէ ես Երևանցի եմ, Կարբին մեղանից մօտ է, խնդրեց, աղաչեց, օձի լեզու թափեց, որ այս թուղթը իմ, կամ ուրիշի ձեռքով հասցնեմ Կարբու զանգակատունը: սպահանցին ինքը մեր կողմերը չէր եղած. իւր ասելովը՝ նրանք բնիկ հին կարբեցի են եղել. իրանց պապերից մէկը կտակել է իւր զաւակներին, թոռներին և ծոռներին՝ երբ և իցէ, ինչպէս որ լինի, էս թուղթը հասցնել Կարբու Կիզի-մատուռի զանգակատան պա-

տուհանքը. նզովքով ու անէծքով պատուիրել է իւր կտակը կատարել:

— Եւ իմա, ասում էր ինձ սպահանցին, կարծես մեր պապի անէծքը մեր տան գլխին ծանրացել է, մեր մէկը երկու չի դառնում, անբաղդութիւնը տարեց տարի մեզ իւր ճանգերի մէջ է սեղմում: — Ազատւա՛մ էր, որ էն ցատու՛մն իրանց տանիցը վերացնեմ, որովհետեւ իրանք աչք չեն բացանում, որ անձամբ կատարեն պապի հրամանը:

— Ահա տարին լրանում է, աւելացրեց անծանօթ երևանցին, որ թուղթը մօտս է, չը գտայ մի կարբեցի, որին յանձնեմ. շնորհակալ եմ բարեկամիցս՝ խնդիրս կատարեց, քեզ ինձ հանդիպեցրեց:

Ամենայն ուրախութեամբ յանձն առաւ Բղդէն և թուղթը դրեց ծոցը:

Այս թուղթն էր այժմ, որ Բղդէի ուշադրութիւնը գրաւել էր:

Դրեց շը դրեց նա եռանկիւնի թղթի փաթեթը Կիզի-մատուռի զանգակատան բաց պատուհանի վերայ, որ նորա աչքերի բբերը յետ բացուեցան, խելացնորի կերպարանք ստացաւ և աչքը տնկեց պատուհանի տակի շարաքարերից մէկի ճեղքին:

Խնչ էր այն:

Դուրս թռան յանկարծ միմեանց ետևից, կարգապահ զինուորների նման, ոսկեփայլ և խոշոր իշամեղունները, որոնց ժողովուրդը բոռ անունն է տալիս և որոնց խալթուածքը կարճի կծածից աւելի կսկծեցուցիչ է:

Բռները հետևելով իրարու՝ պատուհանից դուրս էին թռչում:

Միջատների այդ տեսակից ամեն ոք զգուշանում է, միայն մեր Բղդէն էր, որ անշարժ արձանի նման տեղումը միտեց ու մնաց: Նա շուտաւա՛ր էր: Նորա գլուխը միայն ամառուայ շոգին՝ թէժ արևի տակ՝ դաշտումն արածող և ճանճերից ձանձրացած ձիու գլխի նման բարձր ու ցած էր անում. նա աչքով ուղեկցում էր իւրաքանչիւր իշամեղունին, մինչև որ օդի մէջ աներևութանում էին:

Սթափմունքը շատ ուշ եղաւ, կերևի, Բղդէի մտքովը մի բան անց կացաւ. մի ակնթարթում գլխարկով տուեց, ճեղքից դուրս եկող միջատներից երկուսին սպանեց: Միջատը գետին ընկաւ և թափուած խճերի մէջ կորաւ:

Բղդէն կռացաւ որոնելու իւր արած որսերը:

Օ՛հ, սարսա՛փ, ոսկի էր առաջին անգամ նորա աչքով ընկած առարկայն, մի մեծ, մէջը փոս, գոգաւոր ոսկի:

Այնպիսի արագութեամբ չի յարձակուում որսկան կատուն ծակից անզգուշաբար դուրս սողացած մկան վերայ, որքան Բղդէն իւր անձը սարսուռ ձգող ազնիւ մետաղի վերայ: Ձեւ կարծում, թէ նա զոգացած լինէր իւր մատի կսկիծը, կամ տեսած լինէր արիւնը, որ սուր քարերին դիպչելով՝ ծորացել էր նորա եղունգի ծայրից:

Բղդէն չը դադարեց որոնել. ինքը երկու հատ բռռ էր սպանել. այդ նա լաւ տեսել էր, իսկ այժմ գտել է միայն մինը. անկարծիք, երկրորդն էլ պէտք է լինի և կայ, մի ինչ որ դեղին փայլուն բան պսպղում է խճերի արանքում. ոսկի է անշուշտ: Երկմտութիւն չի պէտք, իսկական ոսկի է: Բղդէն շատ տանջուեց և չը գտաւ:

— Յիմա՛ր եմ, ի՛նչ է, բարձր ձայնով արտասանեց Բղդէն, իմ բաղդին իմ ձեռքով եմ հարուածում. ո՛ւր եմ թողնում սրանց հեռանան:

Նա դիւթական զօրութիւնով օժտուած թուղթը յափշտակեց լուսամտի վրայից, գրպանը կոխեց և ձեռքով պինդ փակեց քարի ճեղքի բերանը:

Բղդէն կրակ է կորուել. սարսափելի միջատների խայթիւնը նորա վերայ լուի կծածի չափ սկզբումը չեն ազդում, ոսկու խանդը ցաւի մրմուռի զօրութիւնը չքացրել է: Բայց այս միս ու արիւն է, քար ու երկաթ չէ, խայթի հարուածը մէկ չէ, երկու չէ՝ հարիւրաւոր սլաքներ են շեշտուում նորա ձեռնամիջին, սրան տանել չի լինիլ: Որքան և ատամները միմեանց սեղմեց, երակները ձգեց ամրացրեց, բայց և այնպէս յաղթուեցաւ, թուլացաւ, ձեռքն ինքն անդիտակցաբար յետ գնաց խորշաբերանից:

Ո՛վ զարմանք. անցքն ազատ է, բայց բռռերն այլ ևս չեն դուրս գալիս, իսկ բզզոցը զանգակի մեղմացող զոզանջիւնի նման դիւ լսուում է Բղդէի լսելիքում:

Ի՛նչ է այս:

Բղդէն չը կարողացաւ հասու լինել. արդեօք ի՞նքը ձեռքով ճմլել է խորշից գլուխը նոր դուրս հանած ժամանակը մի երրորդ իշամեղուի, որ ոսկի է դարձել և անցքի մէջ ամրացել մնացել, թէ ինչպէս պատահեց, որ խորշն ինքն իրան փակուեց:

Այսպէս է, այնպէս է, վեց հազարեակի զօրութիւնն է,—իւր գիտնալիք գործը չէ, բայց երբորդ ոսկին փականքի պաշտօն է կատարում, կենդանի զանձներին ներսը բանտարկել է, այլ ևս դադարեց միջատների ուղևորութիւնը:

Ով կեանքի մէջ առիթ է ունեցել տեսնելու բարակ որսկան շանը, երբ նա քանդում է ազուէսի գետնափոր որջի բերանը, նա կը նմանեցնի այս վայրկենում մեր Բզդէին որսորդի բարակին: Նտապ շտապ յետ է տալիս որսկան շունը ճանգերի ծայրով փորուած հողը և հոտոտելիքը դնի հետ միասին թաղում ծակամուտքի մէջ հաւաստելու՝ ներսն է այժմ թանկագին մուշտակացու կենդանին:

Սոյն օրինակ քանդում, քերում է Բզդէն արիւնլուայ եղունգներով պատուհանի քարացած, դարերով ամրացած կրի շաղախը, որպէս թէ, իւր խելքով լայնացնելու ճեղքի բացուածքը և դուրս քաշելու ներսումն ամրացած մետաղը. բայց երբ եղունգները չեն բռնում, երբ մատների ոյժն ու յարմարութիւնը անբաւական են լինում ծայրն երևեցնող դրամը դուրս կորզելու, կոլոտը գլուխը կորցրած՝ ատամներն է ի գործ դնում, քիթ ու մուտքն է քարերին շփում:

Ի դուր էր խեղճի տանջանքը. կարելի է ասել ամբողջ ժամ ունայն կորցրեց նա. երբեմն կռանում էր, շաղախները քանդում, երկրորդ սպանածը որոնում և դարձեալ ծակում մնացածի ետևից ձգտում. ոչ մինն է ձեռք գալիս և ոչ միւսը: Նա սկսեց մինչև անգամ ատամներով կրծոտել քարին կպած շաղախը, բայց դուր ջանք և անօգուտ վաստակ, քարը շաղախից և շաղախը քարից կարծրացել էին:

Յուսահատութիւնից սիրտը քիչ էր մնում պատռուի, և գուցէ առաջին անգամ իւր երեխայութիւնից դուրս եկած օրից բաց եղաւ՝ ճիշդ կամակոր երես տուած մանկան նման, որի անտեղի պահանջներն անկատար են մնում քնքոյշ մօր կողմից:

— Ի՞նչ ցաւ ու կրակ է, մրմնջաց նա, հիմա ես ի՞նչ անեմ:

— Ուրիշն է, շատ հեշտ գործ,— շտապի՛ր տուն, ա՛ռ բրին ու մուրճը և վերադարձի՛ր, դրդեց նրան ներքին ձայնը:

Բայց օրով-ցերեկով ո՞նց անէր. Կիզի-մատուռը գիւղի կենդրոնումն է, դուռը շարունակ բաց է, չարաճճի մանուկները սովորա-

բար խաղում են աւերակի մէջ, վայրի աղանձներ ընդն են քանդում, մաշկաթե չղջիկներ են հանում պատերի արանքներից. բացի դրանից քուչիցն անցկենողը կարող է նկատել նրան, և ահա Բղդէն իւր հացը կերաւ:

Ի՞նչ անի ուրեմն, ի՞նչ քար գցի իւր գլխին: Նա մնաց տարակուսած կանգնած, ոչինչ ելք չը կայ. յետ ու յետ գնաց անգիտակցաբար, նստեց թափուած քարերից մէկի վերայ ու աչքը տնկեց պսպղան ոսկու երեւցող ափին: Երբեմնապէս էլ նորա գլուխը յետ է դառնում դէպի դուրս. — այդ զգուշութեան թելադրութիւնն էր:

— Յորեկով... գիշերով... ցորեկով... գիշերով... կրկնեց նա մի քանի անգամ այդ անկապ խօսքերն և վերջը տեղիցը կանգնեց:

— Ե՛ւ ցորեկով և՛ գիշերով, թէկու՞ղ տարիներով, մինչև որ ձեր բունը քանդեմ, իմ սիրուն շողշողուն բռնե՛ր. գլուխս այստեղ վեր կը դնեմ և ձեզ չեմ թողալ այստեղից հեռանաք: Ի՞նչ ուրախ եմ, որ ձեր ընկերը ձեռքիս տակին ճխլուեց, պատի խորշումը մնաց, ձեր ճանապարհը փակեց, ձեզ բանտը ձգեց: Ափսո՛ս, սկզբից չիմար ոչխարի նման պէլացել մտիկ էի տալի, թէ ի՛նչպէս են ձեր ընկերները մին մին հեռանում, իմ տունը քանդում, սպահանցու տունը շինում. տե՛ս ի՞նչ Աստուած խելքս առել էր, թլիսմի թուղթը շուտ չէի վերցնում: Հը՛... հը՛... հը՛... տեսա՞ք ինչպէս տաղ արիք. հարիւրաւոր տարիներ հանգիստ պառկած էիք, ո՞նց հիմի էլ լուռ կացաք ու կու՛ն եկաք քարի տակին, որ մի ժամից շղջկաք իմ քսակի միջին:

— Դուք հօ ի՞մն էք ու իմը, բայց ի՞նչ եղաւ ձեր երկրորդ ընկերը. ես իմ աչքովս տեսայ, որ գտակով ձեզանից երկսին սպանեցի, ա՛յ մէկն ահա իմ գրպանում, հապա մի՞ւսն ուր է:

— Ձէ՛, չէ, գլուխս մահի կը տամ ու ձեզնից ձեռք չեմ քաշիլ, հաստատապէս շեշտեց Բղդէն և նորից սկսաւ շուռէ շուռ տալ գետին թափած խճերը:

Արեւի ուղղահայեաց ճառագայթն այնպէս զգալի կերպիւ չէր ծակծկոտիլ ու փակիլ Բղդէի աչքերը, ինչպէս մի քարի մուկը անկիւնից հուրհրատող փոքրիկ մետաղը: Նրեք անգամ միմեանց վերայ ցնցուեց նորա ամբողջ ջղախն ցանցը, մինչև նա փայլակի արագութեամբ յարձակում գործեց իւր որսի վերայ և հողախառն սեղմեց բռան մէջ:

Այս տեսիլք չէր, երևակայութեան վաղանցուկ խաղ չէր. այժմ Բղղէն բռնած ունի ձեռքի փի մէջ երկու հատ ոսկի—փայլուն ոսկի. հողը՝ որի մէջ հարիւր տարիներով նրանք թաղուած են եղել, կարծես աւելացրել է նրանց փայլը:

Բղղէն համբոյրներն անդադար կրկնում է և չի կշտանում: Տարփածուն, տարիներով ձգտած իւր սիրեկանի քամակից և հագար տաժանելի տանջանքներից յետոյ հասած սրտի փափագին, այնպիսի խանդակաթ ակնարկ և համբոյրներ չի դրոշմիլ իւր սրտի առարկային, ինչպէս կօլոտ չարչին թեթեւ և փոքրիկ ոսկիներին:

—Այս երկու, բարձր ձայնով հաշուեց նա, դեռ քանի՛ երկուսը դարսուած են քո տակիդ, ո՛վ անխօս քար. շատ չի քաշիլ, դրանք բոլորն իմը կը լինին, և, սպասի՛ր էն ժամանակը, ջհուտ Աղաջան, դու քո հացը կերար:

Բղղէն սկսեց խճերով ծածկել քարի բացուածքը, այնպէս որ ոսկու ծայրն էլ չ'երևաց:

—Ձարն սատանէն հակառակ է, բաց դուռն է, մէկը ներս կը մտնի, ոսկու փայլն աչքերին կ'ընկնի: Այն ժամանակն արի՛ էլը ցըլիցը հանի՛ր, համ էն մարդի արիւնը զուր կը թափեմ, համ իմ գլուխս կը կորչի, փսփսաց Բղղէն իւր մէջ և յետ յետ նայելով՝ դուրս եկաւ զանգակատանից:

Նորա բացակայութիւնն երկար չը տևեց. մի բրիչ և մի կռան ձեռքին, գող շան նման, զգուշութեամբ մի տեսակ անցկացաւ Կարբու նեղ փողոցներով և իրան ներս ձգեց Կիզի-մատուռ:

Երկու ժամից աւել նա անընդհատ աշխատում էր. քրտինքը գագաթի վերին կենդրոնից առուացել էր և չստերի պատուածքից դուրս հոսում:

Աւելորդ աշխատութիւն էր. մի քանի կռանի հարուածներ և ահա՛, և ահա՛ փշուր փշուր, կտոր կտոր կը թափուէր փուխը և փափուկ քարը: Այդ քարերից շատ կան Հայաստանի ամեն կողմերում. այդ քարերով են կառուցած մեր հռչակաւոր անթիւ տաճարները: Ճարտարարուեստ քարտաշն այդ քարիցն է տաշել և կերտել մեր սուրբ վանքերի վերայ հայ փառաւոր անցեալի դրօշները: Հայ ճարտարապետութեանն յատուկ սքանչելահրաշ քանդակներն այդ փուխը քարերի վերայ են ձեռագործուել և այսօր աշխարհքի

մէջ հայկական ճարտարապետութիւն անուն են յատկացրել: Հեշտ էր ուրեմն Բղդէին փշրել լուսամտի քարը, եթէ նա երկիւղ չը կրէր հարուածների թնդոցով իւր գլխին ժողովել հետաքրքիր հարեաններին:

Բաղդաւոր էր Բղդէն, որ յունիսի վերջերն էր, ամեն ոք իւր կալ ու կուտի, իւր դաշտային աշխատանքի հետ էր, բացի պառաւ կանանցից և մանրահասակ երեխաներից՝ գիւղումը ոչ ոք չը կար. բայց և այնպէս զգուշութիւնը ձեռքից թողնելու չէր, կռանի հարուածները կարող էին հետաքրքրութիւն զարթացնել:

—Տ՛հ, ի՛նչ կը լինի, թող լինի՝ էս ժամանակ ո՛վ կայ գիւղումը, որ քարի թրխկոցը լսի. երկու-երեք հարուած, և ամեն բան վերջացաւ, տանջուելով հոգահաճան եղայ, մահածեց Բղդէն և մի զարկ իջեցրեց քարի անկիւնին:

Նորա ձեռքերը թուլացան, նորա մազերը ոգնու սուր սուր փրշերի նման ցից ցից կանգնեցան. այս դրութիւնն է ստանում կենդանին, երբ մի հեռաւոր ոտնաձայն նրան զգալ է տալիս թշնամու մերձաւորութիւնը. Բղդէի աչքերը մթաղնեցին, երկաթի գործիքը ձեռքիցը թռաւ, ծնկները ճկուեցին: Անշուշտ վայր կ'ընկնէր Բղդէն, եթէ օգնութիւն չը հասնէր նրան նոյն լուսամտի գոգը՝ նա խոնարհեց, գլուխը վայր դրեց լուսամտի վերայ և այնուհետեւ ինքն էլ շիմացաւ, թէ որքա՛ն ժամանակ աչքերը փակ մնաց նոյն անզգայ դրութեամբ:

Ի՛նչ պատճառաւ:

Մի ահարկու և զարզանդելի խուլ թնդիւն էր, որ բարձր երկնակամարից կամ հեռաւոր անդնդից տարածուեց զանգակառան ներսը: Բղդէին թուեցաւ, թէ ամբողջ երկրագունտն իրար անցաւ. մթնալորտի խաղաղ դրութիւնը նորա փակ աչքերի առաջ երերում էր, սրբավայրը գլխովին տարուբերուեց:

Առաջին անգամ, գուցէ, սև փողի նշանակութիւնը ճանաչելու օրից, Բղդէի կրօնական զգացմունքը վիթխարի հսկայի ահաւորութեամբ կռանի զարկի թնդիւնի հետ՝ մատուռի արձագանգի միջոցով՝ իւր բոլոր վեհուցութիւնով նկարագրուեց ջերմութեան և կրօնասիրութեան մէջ սնուած, բայց մոլորութեան մէջ ամենը կորցրած գիւղացի երիտասարդի աչքին:

Արձագանգն էր այն, որ ներս մտաւ կամարակապ զանգակատան պատերի մէջ դրուած հողեայ բզիկների մէջ, ոլորապտոյտներով անդրադարձ շրջաններ արեց և Բղզէի գործած մեծ յանցանքի ահաւորութիւնը նորա մտապատկերի մէջ կենդանի նկարագրեց:

Բղզէի և ամեն մի հայ-քրիստոնէի համար Աստուծոյ սուրբ տաճարների ամեն մի քարը նուիրական է. նա լաւ գիտէ, որ մինչև անգամ անհաւաստ Տաճիկը, վայրագ Քուրդը, սատանապաշտ Եգիպտոսի մի մթին երկիւղածութեամբ են վերաբերուում դէպի այդ աւերակ սրբավայրը, շատերը ոտքով մատաղ են բերում, ճրագալոյս են վառում և միայն խիղճը կորցրած շահամոլ սակաւաթիւներն են եղել, որ չեն խնայել պիղծ ձեռքերով քանդել, աւերել մեր վանքերը:

Կոյտ Բղզէն գիտէ այս ամենը և այժմ ինքը ձեռի կեղտ մետաղի համար անհաւատից աւելի զղուելի ու անգոսնելի գործ է կատարում, իւր ձեռքով կործանիչ է հանդիսանում իւր նախնեաց արեան քրտինքով կառուցած սուրբ տաճարին:

Այդ արդարացի պատճառաւ ինքը՝ ահաւոր սրբութիւնը եօթն թերթեան երկնքից լսելի արեց իւր ահեղասպատ բարկութիւնը:

— Մեղա՛յ քեղ, Տէ՛ր, սևերես մեղաւոր-եմ Քո առաջին, հաղիւ երկչոտութեամբ մի շշուռն արձակեց շրթունքներից կոյտը և անվստահ հայեացքով, կուչ ու ձիգ անելով՝ երեսը դարձրեց դէպի զանգակատան կաթուղիկէն: Ես մեղա՛յ Աստուծոյ, խնայի՛ր ինձ, ո՛վ սուրբ Կիզի-մատուռ, մի՛ բլիւր իմ գլխիս, աղաչեց Բղզէն, քեզ էլ քաջ յայտնի է, որ քեզ քանդելու մտքով չը զարկեցի քո քարին:

Կարծես, երկնային բարկութիւնն անցաւ, ամենայն ինչ նախկին անշարժութեան մէջ մտաւ, լռութիւնը թագաւորեց, արձագանգը դադարեց:

Մի քանի րոպէ ևս մնաց Բղզէն և գլուխը բարձրացրեց:

— Հապա ի՞նչ անեմ, թողնե՞մ այս սլապղան ոսկիքը քարի տակին թաղնուած, կամ թէ թլիսմը կրկին տեղը դնեմ, ճանապարհ տամ՝ գնան, հեռանան, ո՛վ գիտէ ո՛ւմ ճանգն ընկնեն ու ես այստեղ աչքերս պլշած՝ ձեռնունայն դառարկ յե՛տ նստեմ և օրը մինչև երեկոյ ոտքիս կաշին ուտելով, լեզուս կէս գազ կախած, որսորդի շան պէս գիւղէ գիւղ քարշ դամ, թէ մի քանի սև փող պէտք է աշ-

խատեմ, որ նրանով կարողանամ փողի, անունի տէր դառնալ ու ջհուտ Աղաջանին—իմ դսերիմ թշնամուն հողի հետ հաւասարացնել, գլխի վերայ կործանել:

—Ամա՛ն, ո՛վ սուրբ Կիզի-մատուռ, քո զօրութիւնի՛ն մատաղ, տարեկան հինգ նաւակատիկին մի մի սպիտակ գառը քո գռանը կը մորթեմ, հում հում կը բաժանեմ, միայն թէ զու մեղք չը համարես, չը բարկանաս, գլխիս խռով չը կենաս, թողնես, որ ես էս քարը տեղահան անեմ, ոսկիքն իմը շինեմ, ջհուտ Աղաջանի աչքը հանեմ, ես խօսք եմ տալիս՝ նորից իմ ձեռքով քարն իւր տեղումն յարմարացնել:

Բղդէն սիրտ առաւ իւր խոստմունքից և երեք անգամ երեսին խաչակնքեց:

—Հիմի գիտեմ, որ Կիզի-մատուռն իմ կռանն է, վստահօրէն ասաց նա, երբ իւր աչքին երեւաց քարի ներքին կողմը, քարքարուտների մօտ, մի լայն ճեղքուած:

Անմիջապէս բրիչի ծայրը խռուչին դէմ տուեց Բղդէն և մի վերջին ուժով քարը տեղահան արեց:

—Բը՛գ...վը՛գ...պը՛գ... շչացին Բղդէի ականջին հազարաւոր իշամեղուններ և իրար խառնուեցին:

Մի ըրպէսչափ շշմից Բղդէն, անզգայօրէն շրթունքները լետ բացուեցին, աչքերի բբերն ու բունը լայնացան, մատները անդիտակցաբար շռուեցին, իրարից հեռացան, և ո՛վ գիտէ, դեռ կարելի է շատ մնար այդ անբնական դրութեան մէջ, եթէ նոյն ինքն անբան միջատները չը սթափեցնէին նրան:

Բոռերը գտան իրանց հանգստութիւնը խանգարող թշնամուն, սրեցին իրանց՝ առանց այն էլ՝ սուր խայթոցները և չորս կողմից զրոհ տուին քաջ պատերազմողների հմտութեամբ Բղդէիս վերայ: Սուր սուր սլաքների հարուածից աւելի զգալի էին միտում իշամեղունների կնճիթիկները Բղդէի երեսին, պարանոցին, աչքերին, քթին, ձեռքերին, միով բանիւ մարմնի բոլոր բաց տեղերին:

Ի զուր չէ՞ր նորա ճշոցը. նա սկսեց աչքերը փակել և ձեռքերը օդի մէջ պտըտեցնել, որպէս թէ իւր բազուկների զօրութիւնով ցրուելու թշնամու բանակը: Բայց շատ սխալ էր նորա հաշիւը, թըշ-

նամին խիստ հզօր է եղել. կատաղի միջատները այդպիսով աւելի գրգռուեցին և աւելի խստօրէն յարձակում գործեցին:

Էլ չը տարաւ Բղդէն, նա յաղթուեց. կծած տեղն ուռչում է ընկուզաշափ և բարձրանում:

Բղդէն երեսի վերայ վայր ընկաւ խճերի մէջ:

Այժմ թշնամու բանակին օգնութիւն հասան Բղդէի իրան ձեռքերը. ապտակներ է, որ իջեցնում է թշուառական մոլորուածն իւր գլխին, վզին, երեսին. այդպիսով, իւր խելքով, բոռերի դէմ է պատերազմում, բայց իսկապէս ինքն իրան է ծեծում:

Այդ հնարքն էլ չ'օգնեց:

Բոռերն աւելի զայրանում և չեն հեռանում. շատերն սկսեցին խայթոցները նորա հագուստի գործուածքով ներս խցկել:

Այս անգամ անձնապաշտպանութիւնը յաղթեց ազահուծեանը. կսկիծն ու մրմուռը, քիչ է մնում, Բղդէին ուշագնաց անի. նա աչքախուփ, խարխափելով դուրս ընկաւ մատուռի միջից:

Նա փախչում է աննպատակ դէպի դաշտը:

Նորա բաղդից ոչ ոք չը հանդիպեց նրան, ապա թէ ոչ, ամենքը կը վախենային այս մարդակերպ փչուած, տկճած տկից:

Միջատների կծած տեղերը հաւասար ուռել էին, աչքերի կոպերն ամբարտակի նման բարձրացել, ծածկել էին տեսանելիքը, մի մի նեղ անցքից միայն աչքերը հազիւ գործում էին:

Ցաւը չը թողեց Բղդէին շատ յառաջ վազելու:

Մի առուակ խոխոջելով վայր էր հոսում լեռնաթմբից և Բղդէն նստեց ջրի ափին ու գլուխը դէմ տուեց փոքրիկ ջրվէժի սալին:

Մի դիւթական հանգստութիւն, մի մեղմիչ զովութիւն ամօքեց ցաւի կսկիծը:

Կօլտը գտաւ իւր դեղը. սառը ջուրը փրկարար ազդեցութիւն գործեց: Աւելի մեղմացուցիչ էր լինում հեղուկ տարրը, եթէ երբեմնապէս մի բարակ քառի, թէև լինէր նա ոչ ցուրտ, հովահարում էր ջրի թրջած տեղերը:

—Ափսո՛ս, ջուրը տաք է, մտածեց Բղդէն, ի՛նչ լաւ կը լինէր, եթէ սուրբ Յովհաննէսի սառն աղբիւրը հեռու չը լինէր, բոպէի մէջ երեսիս ուռուցքները կը նստացնէր:

Երկար չ'եղաւ նորա մտածմունքը. անձը քաղցր է, ցաւի

խտուութեան գէժ տաք առուակն անբաւական էր, նորա արած տպաւորութիւնը վայրկեանական էր, ուռոյցը քանի գնում, բարձրանում էր, հզօր միջոցների պէտք էր դիմել, և այդ միջոցը—իւր բուժուելու ամենաճիշդ դարմանը նա գտաւ սուրբ Յովհաննիսի ցրտասառոյց աղբրակը:

Կիզի-մատուռ, ոսկի, ամենը զոհուեցին անձի առողջութեանը, բոլորը Բղդէն մոռացաւ: Ի՛նչ արեց, մոռացա՛ւ, այն էլ Բղդէն:

Հազար ա՛խ ու վայ արեց, հարիւր անգամ ծնկները ծեծեց, քանիցս քայներն իրանք իրանց էին մատուռի կողմն ուղղուում, բայց կրկին յետ էին կատուում: Թշնամու բանակը քնած չէր. իշամեղուներից մի քանիսը գաշտումն էլ նրան հանգիստ չէին տալիս, առ ոչինչ համարելով Բղդէի գործ դրած զէնքերը—ձեռքերը, հագուստի քղանցը՝ ձեռք չէին քաշում նրանից. մի յանգուզը մինչև անգամ իջել էր նորա թիկունքին և իւր բարակ ու սուր կնձիթը շորերի գործուածքների միջովն էր ցցել Բղդէի թիկնամէջը: Ի՛նչ դժուարութեամբ ձեռք հասցրեց Բղդէն և բռնին հեռացրեց:

—Ո՛վ է իւր գլխիցը ձեռք քաշել, որ բռնբրի ճանգն ընկնի, կամ ո՛վ կը հասկանայ, թէ ամեն մի բռնն երկու երեք թուման փող աժի, թլիսմի թուղթը գրպանումս է, էս օր չը լինի, էգուց լինի, դեռ ցաւի կսկիծը հովացնելու ճարը տեսնեմ, ասաց վերջապէս Բղդէն, դարձրեց երեսը դէպի հարաւ և փութաց բռնել Քասախ դետի խոր անցքի ճանապարհը:

Սուրբ Յովհաննիսի աղբրակն էր շտապում նա:

ԺԴ.

ՍՐԻՐԻ ՅՈՎՀԱՆՆԷՍՆ ԵՒ ԻԻՐ ԱՂԲԻՒՐԸ

Կարբուց դէպի արևելա-հարաւ, Քասախ գետակի ձորաժայռի վերայ, մի գետնափոր խղճուկ գիւղի մօտ դառնուում է մի կիսափոր-ճան սքանչելակերտ աւերակ վանք:

Գիւղի կողքովն անց է կենում: Աշտարակից Աբարան տանող ճանապարհը, որտեղից շատ հեռու չէ հսկայական շէնքը:

Սովորական անցորդը, կամ անհետաքրքիր գեղջուկը մի բարեպաշտական երկրպագութիւն մատուցանելով կատարած կը հա-

մարի իւր պարտքը դէպի քրիստոնէական սրբարանը. իսկ հնախոյզ գիտնականը յանցանք գործած կը լինի, եթէ ժամեր և օրեր չը նուիրէ ճարտարարուեստ և հրաշալի շէնքի ուսումնասիրութեանը:

Յովհաննու վանքն է այդ մեծափառ տաճարը, Արագածոտն գաւառի բազմաթիւ հռչակաւոր վանքերի առաջիններից մինը:

Կար ժամանակ, որ Յովհաննու վանքի պարսպում շէն էին հարիւրաւոր վարդապետական խցեր իրանց տնտեսատնով, լիառատ մառանատներով, թանգարաններով և ժառանգաւորաց դպրոցով. մի օր Յովհաննու վանքը կենդրոնն էր Արարատեան աշխարհի աստուածաբան հեղինակ մատենագիրների. 700 տարի առաջ էր այդ, իսկ այսօր միայն քարակոյտների դիզուածքներ և պատերի բեկորներ են մնացել նախկին փառազարդութիւններից:

Հրաշասքանչ է Յովհաննու վանքի ճարտարապետութիւնը. ամբողջ շէնքը կոփածոյ կարմիր և սև քարերից պնդապէս ամրացած և շաղախուած են միմեանց հետ. մեծ դժուարութեամբ հընարաւոր է այսօր էլ որմնաքարերի կցուանքը որոշել:

Մի ահագին քանդակալից և դրոշմաւոր յաղթանդամ շինութիւն պարսպի միջակէտումը հպարտ կանգնած՝ զետեղում է իւր մէջ երկու լայնադիր տաճարներ: Մինը գաւթի է և միւսը բուն տաճարը:

Հիւսիսից, երևի վերջին դարերում, միացած է փառահեղ շինութեանը մի նոր եկեղեցի սագաձև կամարով:

Երկու կաթուղիկէ հովանաւորում են մեծանիստ տաճարին:

Մինը կանգնած է լայնատարած գաւթի գլխին, ամրացած չորս բոլորակաձև հաստատուն սև ապառաժեայ կոփածոյ սիւնների վերայ, իսկ երկրորդը՝ բուն տաճարի գլխին:

Երկուսն էլ կիսաքանդ են:

Թէ տաճարի և գաւթի միջին կողմը և թէ արտաքին երեսը լիքն են զարմանալի նուրբ քանդակներով. զանազան խաչեր և սրբոց պատկերներ են ներկայացնում այդ քանդակները:

Վանքի հարաւային պատի վերայ, դրսեւից, վերից վալը ձգուած են երկու խաչաձև կարմիր քարեայ շրջանակների մէջ հարաւային պատուհանները. մի այդպիսի շրջանով ևս մէջ է առել արևելեան կողմից սեղանի լուսամուտը:

Վանքը կանգնած է անդնդախոր ձորի ծայրին՝ քարափների վերայ:

Մի ահագին այս ձորի կողմից մտնում է ուղիղ վանքի տակը։
Վանքի հարաւային կողմը Քասախի փին ձորի մէջ քարափ-
ների խողովների մէկից դուրս է ցայտում սուրբ Յովհաննիսի ամե-
նապարզ և վճիտ աղբրակը։

Ոչինչ էջք, ոչինչ ճանապարհ դէպի աղբրակը վանքի պարսպից
թոյլ չեն տալիս ամենի ժայռերը. սեպածե քարափները դուրս են
ցցել վանքի տակի քարայրի շարունակութեամբ իրանց խորթ ու
բորդ քիթ ու մոռութը, հէնց իմանաս՝ համբոյր տալու ձորի միւս
ափերի ժայռերին, իսկ դրանց տակը կազմուել է անհուն անդունդ,
կարծես, վերեւից նայել վստահացողին գահավէժ կործանելու։

Ուզում եմ ասել, թէ աղբրակը երկու-երեք հարիւր քայլ
հեռաւորութիւն հազիւ թէ ունենայ վանքից, բայց իջնելու ճա-
նապարհ միանգամայն չը կայ։

Հաշուի տակ չեն մտնում գիւղական մանուկները. նրանք գետի
յորձանքը ճղելով՝ կարող են միշտ խմել սուրբ Յովհաննիսի աղբրի
քաղցրանոյշ ջուրը. նրանք վայրի այծերից աւելի ճարպիկութեամբ
ներքև կը սողան ամեն մի քարանձաւի խորշից։ Քասախի ձորամի-
ջում երեխաների համար անմատչելի տեղ չը կայ։

Կանոնաւոր և միակ ճանապարհը, որտեղից կարելի է այցելել
սուրբ Յովհաննիսի աղբրակին, այդ Կարբու ձորամուտքն է՝ վանքից
կէս ժամաչափ հեռի. նոյնքան էլ կը աւելի ձորամուտքից մինչև
աղբիւրը։ Նշանակում է՝ Յովհաննու վանքից աղբրակը գալու հա-
մար՝ մի ամբողջ ժամ զոհելու է։

Երջակայ բնակիչների համար նուիրական սրբատեղի է սուրբ
Յովհաննիսի աղբրակը։ Ձորի մէջ՝ աջ ու ձախ ափներից՝ շատ տեղեր
բղխում են մեծ ու մանր վճիտ աղբիւրներ, բայց նրանից ոչ մէկն
այն յարգն ու նշանակութիւնը չ'ունի, ինչպէս այս ընկուզի տրամա-
գծի չափ հազիւ բղխող աղբրակը։ Ամեն ոք մի ներքին երկիւղա-
ծութեամբ է արտասանում սուրբ Յովհաննիսի աղբրի անունը.
հազարաւոր հրաշագործութիւններ պատմուում են պառաւներից
սուրբ Յովհաննիսի աղբրի մասին. նորա ուխտաւորն անպակաս է։

Հարցասիրական է լսել աշտարակցի երկու պառաւի խօսակցու-
թիւնը. դրանցից մինը թող լինի հանգուցեալ Քարտաշենց պառաւը,
միւսը՝ իրանց հարեան Գիւլթահարը։

— Հաստատ կենայ սուրբ Յովհաննէսի աղբրի ակը, մեռնիմ նորա տիրոջ՝ սուրբ Կարապետի ոտի տակին, ասում է Քարտաշենց պառաւր. աղջի՛, վեց ամիս էր Հօլիս (Հռիփսիմէ բառի կրճատումն է) դող ու էրոցքի մէջ տանջուում ու մաշուում էր, էլ գրբաց ու ջինդար չը մնաց, որ չը լիացրինք, խուճկ ու մմին հօ՛հ հաշիւ չը կայ, որ սրբերի դռներին վառեցինք. մեծ տէր-Առաքելի կապած դողը թրի պէս կտրում է. խեղճ երէցն երեք չորեքշաբթի իրար վերայ կապեց երեսիս դողը, ճար ու մուռքիւն չէլաւ. լալազար ծաղկի նման կարմրաթուշիկ բալէս մի բարակ դերձան էր դառել, ոսկրները մէկ մէկ համարուում էին, քիթը բռնէիր՝ հոգին կը տար. մնացել էինք մոլորուած, ուշք ու մտքներս միանգամայն կորել էր, սուրբ Յովհաննէսի աղբիւրը, հէնց բռնի, մոռացել էի. Ասում է՝ Ծոփն ընկնողը ձեռները կ'ածի. Լոյս դառնայ տատմէր պառաւի հէրը, որ սուրբ Յովհաննէսի աղբրի անունը չը տուեց, ես ինձն ու ինձ գետինը մտայ. դու մի՛ ասիլ, հէնց սուրբ Յովհաննէսի աղբիւրն է մեր վերայ բարկացած եղել. Զօրանայ Տրդատս, էն օրն և եթ մի շիշակ, տարեկան, դմբաճիկ թօխլի-ոչխար է առել, ձիու վերայ նստել, առջևը դրել, մենք էլ տուն ու տեղով հաւաքուել ենք, տարել սուրբ Յովհաննէսի աղբրի մօտ մօրթել, մատաղ արել: Աղջի՛, կ'աւա՛տաս, Հօլուս աղբրի սառը ջրովը լողացնելս ու դողն ու էրոցքը դանակի պէս կտրիլ կորչիլը մին էլաւ: Ազիզ քօրփէս (փոքրիկ) մի շաբթի մէջ առաջուանից աւելի լաւ լցուեց, կարմրեց, վաշնեց, էս օր էլ հօ՛ք քո բարի աչքովդ տեսնում ես, գեղի աղափ աղջկերանց աչքն ու մարալն է, թւերն եկել են, էս օր էգուց կը թռցնեն:

— Ընչի՞, քի՛րս (այո), դու սուրբ Յովհաննէսի աղբրի զօրութիւնից խամ էի՞ր, մեղադրում է խօսակիցը, դու չը գիտե՞ս, որ ինքն է դող ու էրոցքի աէրը. գարունքը ծէգում է, չորս բոլորքի գեղերից նորա ըխտաւորը չի կտրուում, թուրք ու հայ, ով դողացնում է՝ դպա նրան է վազում, փրկուում ու յետ դառնում: Ես ինքս էլ Մողնու ծեփի տարին ¹⁾ էնքան դողացրել էի, որ ուժից ընկել

¹⁾ 1840 թուականին էր, կարծեմ, Մողնի գիւղը ժանտախտը աւերեց, կառավարութիւնը զօրքով չըջապատեց, հաղորդակցութիւնն արգելեց, Այդ արգելքը ժողովուրդը ծեփ կամ ծեփ ել բառով էր արտայայտում:

էի, երեսիս գոցնը՝ դեղին զափուանը քեզ օրինակ. շատ էլ տապ-տապում էի՝ օր յառաջ ինձ քցել սուրբ Յովհաննէսի աղբիւրը ու ական առաջին շինած պստիկ գեօլիցը (չճոյ) մի երկու փարչ ջուր վրէս ածել, բայց քեզ յայտնի է էն տարուայ ցասում բարկութիւնը, գնայ, ոչ յետ գայ, խէր բանը (ծանոթութիւն) Մոզնին վեր էր կալել, ռսի սալդատը չորս բոլորքը կապել նստել էր, երկնքի թւաւորներին էլ չէին ուզում բաց թողալ, ո՛վ էր իւր գլխիցը ձեռք քաշել, որ գնայ իր ոտովը կրակը մտնի, կէս սհաթումն ուռուցողորի, սեանայ, անծուխ կտրուի ու ճրագի պէս հանգչի. քո միտը կը լինի, կարծեմ, հասած կատարած աղջիկ էիր, էնպէս չի՞, ես երկու տարուան քօղը գլխիս հարսն էի:

— Գա ի՛նչ ես ասում, էս օր էլ աչքիս առաջին է, ընդհատեց Գարսաշենց պառաւը, սալդատների մեծաւորին կռնատ կապիտան էին ասում, մեր տանն էր կենում. դէ՛, էն ժամանակն էսքան այ-վան օթախները (վերայարէ) ո՛վ էր սւցրել, գեղի լաւ տներիցը մինն էլ մեր էս օրուայ խոտանոց գառած կտեր օթախն էր: Հէնց էն տարին ես նշանուեցի: Էն գրողի տանելուն, ո՛վ գիտէ, մեռած է՞, թէ կենդան, իւր գործքովն իրան օղորմի, մի օր թունդրի համար աթար (շափոր) ներքեւ ածելուս՝ մին էլ օթախիցը դուս եկաւ ջրի փարչը ձեռին ու ոտով գլխով ինձ հասկացրեց, թէ գնա՛, ջուր բե՛ր: Դէ՛, նորա աչքին ո՛վ էր երևում, շուաքը տեսնելուս՝ օխտը պու-ճախն էինք ներս պրծնում, մէրս մահի կը տար, հէնց ահ էր տուել ինձ ու մեր լսի բաժին ջրատար Թէլլուին՝ պստիկ աղպօրս նշանածին (կէն), խեղճն երկու տարէն հարսն էր. հէնց որ լսում էինք, թէ ռաները բակումը ման են գալիս, մենք տեղներս սասանում էինք: Սատանական էր, էդ օրը մէրս գնացել էր մեր խնամի Մայրանին գլուխ ապրէք (ճիւղարան)՝ իւր փարբեցի հարսի մօր աշխարհքիս ցաւ ու դարդիցը ազատուելու համար. տղամարդկանցից էլ մեր տանն ոչ ով չը կար. ես էլ գիտէի, որ կռնատ կապիտանը տանիցը հազարիցը մի անգամ չի դուրս գալիս, արխէյին բարձրացայ կտուրն ու աթար ներքեւ թափեցի: Էն էի ասում, աղջի՛, որ յանկարծ դուռը բաց չ'արեց ու շէմքի վերայ կանգնած փարչն ինձ մեկնեց, միսս փշաքաղուեց: ձարն ի՛նչ, գնացի, լցրի ու աղլուխս ընչանք պնչիս ծէրը ցած քաշած՝ գլուխս կրծիս մէջ

կոխած՝ վերև բերի։ Տեսայ՝ դուռը ծածկել էր ու ներս մտել։ Սիրտ չ'արի, որ տուն մտնեմ, դուռը կամաց ծեծեցի։

—Պե՛ր, ձէն տուեց կռատ կապիտանը ներսից։ Մեր տղէքն ասում էին, թէ հայերէն կենտ երեք խօսք գիտէ—բեր, հաց, ջուր։ Էն էլ սուտ ու սխալ էր ասում։ Բեր ասելու տեղակ՝ ասում էր պեր, հացին՝ խաց, ջրին էլ՝ շուր։

—Խնչ անեմ։ ահահար, գողահար դուռը կամանց ճռաացրի ու սիրաս լքլքալով տուն մտայ։ Խնչ ես ասում, ա՛յ մէրս, մոիկ եմ տալիս, օթախումը մարդ չը կայ։

—Բաս ո՛ւր կորաւ, սատանայ հօ չէ՛ր, որ գետինը վէր խորտակուէր, ի հարկէ, մի տեղ կու՛ն եկած կը լինէր, խօսքը կտրեց խօսակիցը, երևում է մոքումը չարը բնակալած է եղել։

—Սուտ չես ասում, շարունակեց Քարտաշենց պառաւը, գրողը նորա բկիցը կալի՛, նրան խեղդի՛, ջրի փարչը պատի տակին վէր քցեցի ու ետ դառալ թէ չէ, մին էլ էն տեսնեմ, էն սև սրտին դուռը ծածկել է ու միջքով դռանը դէմ ընկել։ Դու մի՛ ասիլ, փորումն օձեր է ունեցել։ քա՛, Խնչ ես ասում, աչքերս սևացան, բերանս տաք ջուրը կոխեց, ոտներս բռնուեցին, տեղն ու տեղս մխուեցի, մնացի, երբ որ էն ծակծկոտութիւնն ժանիքը լետ բացարած՝ լիրբ աչքերով ինձ մոիկ տուեց։

—Հողե՛մ նորա գլուխը։

—Ոնց որ մի նետ օձ, մին էլ էն տեսայ՝ ունեցած չ'ունեցած ձախ ձեռքը շլինքովս է փաթաթել, ուզում է թուշս բերանն առնի։ Ընտուր են ասել՝ Աստուած սարը կը տեսնի՝ ձիւնը կը դնի։ Աստծու ողորմութիւնն էր, որ աջ ձեռքն արմնկիցը կտրած էր։

—Է՛... յետո՞յ... հետաքրքրութեամբ բերանը կիսաբաց՝ հարց տուեց Գիւլբահարը։

—Յետոյ նորա խնդոցը, թէ իրան կեր կըլնէի, բերնի տաք գոլը որ երեսիս չը դիպաւ, ոնց որ տկի բերանից դուս փչած արագահոտ։ Դեռ յառաջ ծնկներս մի ըռպէ ծալուեցին, քիչ մնաց՝ էն քօռանալուի պռօշներն երեսիս էր առնում։ Մին էլ, հէնց իմանաս, թէ զինաւոր սուրբ Գէորգը կարմիր ձիու քամակին ինձ օգնութիւն հասաւ։ մի էնպէս ծուռց բարձրացրի, որ օճուքը թնդաց, գերանները դողացին ու երկու ձեռքով որ դօշին հուպ տուի, ձեռը շլն-

քիցս պոկ եկաւ ու թիկունքի վերայ թրխկալով՝ գետնին փռուեց. բարդու ծառը քեզ օրինակ, որ կարում են ու շուռ տալիս:

—Ա՛յ թէ աչքը հանել ես:

—Ընչանք կռնատ կապիտանն ուժը կը հաւաքէր, խելքը գըլուխը կը գար ու վեր կը կենար, ես շունչս մեր հացատանն առայ, ու ազատուի՝ ամեն հայ-քրիստոնեայ խաթից ու փորձանքից, ինչպէս որ ես ազատուեցի: Ել էդ բանից յետոյ՝ օձի մի՞ս էի կերել, որ ոտս կտուրը գնէի՝ քանի էն գրողի խեղդածը մեր տանն էր կենում: Լա՛ւ, որ Աստուած աշխարհքի աղօթքը լսեց, խեղճ եկաւ, խէր բանը (ժանդախ) վերջացաւ, ճամփէքը բացուեցին:

—Ախար խօսքդ մոռացար:

—Հա՛, էն էի ասում, շարունակեց Քարտաշենց պառաւը, էդ օրուանից զողը ջանս մտաւ, էլ դուս չը գնաց. օրէց օր հալ ու մաշ էի ընում: Ե՛դ հերիք չէր, մի առաւօտ էլ լուսադէմին կուժն ուսեցի, ծէգծէգելահան գնացի ջուրը: Քուչէքում Աղամորդի չը կար, առուի վերայ՝ ջրլցքումը՝ մի հարս, մի աղջիկ չէր երևում: Ես իմ կարճ խելքովս կարծել եմ, թէ որտեղ որ է, լոյսը կը բացուի, աղօթարանը կը կապրտի. սիրտս հանգիստ մօտենում եմ ջրլցքին, կուժը լցնում, հանում, առուի ափին կանգնացնում, ուզում եմ, սաքի թէ, երեսս լուանամ, կուժն ուսեմ, յետ դառնամ: Դեռ երեսիս մի անգամ էի չոփ տուել (չոփ քո՛ւլէ), մին էլ առուի մէկէլ երեսին աչքիս առաջին մի կատուի շափ մարդ է ցցուած. ոչ աւել, ոչ պակաս՝ մեր պոչը ծաղիկ սև կատուն քեզ օրինակ:

—Յիսուս ու Քրիստո՛ս, երեսին խաչ հանեց Գիւլթահարը:

—Ա՛յ քեզ մատաղ, էս պստիկ մարդը քիչ քիչ ձգուեց, ձգուեց, երկարեց, բարձրացաւ, դառաւ ճանճապանենց մեծ բարդի ծառի չափ, հաստութիւնն էլ՝ Խէչանենց պոպոքի ծառիցն երկու անգամ աւելի:

—Աղջի՛, բա դու նստել մտիկ էիր տալի՞ս, ախար ալք է էլել:

—Հողը գլխիս, ցեխն արևիս էի մտիկ տալիս, զո՛րթ է, աչքերս բաց էին, բայց միջին լոյս մնա՞ցել էր, կամ գլխումս զօրութիւն կա՞ր բան հասկանալու. մին էլ տեսայ, որ էդ ալքը թռաւ ջրի մէջը ու լոք լոք տալով՝ իմ կողմն է անցկենում: Դէ՛, Ֆիդոյի թո՛ւը, ոտներդ իրար տո՛ւր: Մտի պէս սեղիցս վեր թռայ ու երեսս

յետ շրջեցիւ Եւ չը գիտեմ, ո՞տքս դիպաւ, թէ ալքը խփեց կժին ու փշրեց. չրխկոցի ձէնն ականջս ընկաւ, բայց ես էլ չը կանգնեցի, մինչև տուն մի շնչի փախալ ու տեղաշորիս վերայ փռուեցի: Եւ հօ՛ աչքս չը փակուեց, ուրիշները դրանից յետոյ օխտը հանգ (առ-գա՛մ) քնեցին, նոր լոյսը բացուեց:

—Վա՛յ թէ ձեռաց դողդ կտրուեց. դող ու էրոցքը մի փուշ (չնչն) բանից կտրուում է:

—Ինչ էլա՞ւ. դու ոչ մեռնիս, դողացնելը դու բոլորը յետոյ տե՛ս, ատամներս որ իրար չեն կպչում, կասես, ջաղացի չախչախ, ձեռ ու ոտս՝ ոնց որ մի ուռու լեզուակ տերեւ՝ թունդ քամու առաջին:

—Բաս վերջը գողդ ո՞նց կտրուեց:

—Դրախտումը ծլվլա՛ս, դու իմ ջրատար մէ՛ր, խեղճի հոգին դուրս եկաւ. ոնց որ դու ես ասում, էլ բան չը մնաց՝ արինք: Շատերը խորհուրդ էին տալիս՝ Թաքիա գեղի թուրք օձ մանածող Օջաղօղուն բերել, որ օձի գլուխը լիզուիս վերայ դնի, աղօթի, բայց ո՞ւր էր ճանապարհ, անտէր կեր ցաւը (Ժանապարհ)՝ ոնց որ երկնքից վէր ընկած՝ մտաւ Մողնի գեղը, անսուր, անդանակ բրդեց խեղճ մողնեցունց ու ողջ գեղը ճրագի պէս հանգրեց. զրա պատճառով ամեն կողմից ճանապարհները կապուեց, գնալ գալը, ոտքը կտրուեց, էլ ի՞նչ Օջաղօղլի, ի՞նչ օտարական. սալդատի ահիցն ո՞վ էր տանից գուրս գալիս:

—Արջի՛, հիմի էդ ուսի արածն Աստծուն ընդդէմ չէր գա՞լ, որ ճամիէքը կտրել էին, սաքի թէ ցաւն ուրիշ գեղ չ'անցկենայ:

—Հօ՛, քո աչքովդ տեսար, որ ցաւը Մողնուցն էն կողմը չ'անցկացաւ. Աշտարակը Մողնուց շատ հեռու է՞, ձէն տաս՝ կը լսուի, մի ուլի քիթ խոռուե՛ց. Կարբին, Փարբին, Պատի գեղը, Յուշին Մողնու չորս բոլորքի գեղերն են, հինգ օրէն ճանապարհ հեռու չեն, ընչի՞ մնի մի տեղը չը ցաւեց ու մէնակ Մողնին հողէց—հողի կորաւ:

—Քա՛, խեղճ ես, հոգուդ մեղք մի՛ անիլ, Աստծուն էլ ընդդէմ չը լինի, գէ՛, էն է Աստծու բարկութիւնն էր, Իր հրամանն էր, որ կերցաւը Մողնումը գոյանայ, ընտեղ էլ վերջանայ, թէ չէ ցաւը մա՞րդ է, որ թօփ ու թուանքով, գիւլլայ-բարութով յառաջը կըտրես, տուն չը թողաս. Աստծու տակիցը փախչել չի լինիլ, մէ՛րս,

դու քո խօսքդ մի՛ մոռանալ. յետոյ ո՞նց արիր, որ դող ու էրոցքդ պրծաւ:

—Մենք մի մեծ, չալիկ-մալիկ աքլոր ունէինք, էնքան նախշուն ու սիրուն էր, որ արևի տակին Խռ.Ֆռում էր, պոչի ջղէն (սփռողոյ գոչի երկայն փեղուրը) քրդի թրի պէս կռացել էր. տեսնեմ՝ մի օր մէրս բռնել է, գոգնոցի մէջ փաթաթել:

—Դէ՛հ, մաշկներդ ոտներդ անցկացրո՛ւ, ասեց, ուր որ կ'երթամ՝ քամակիցս անխօս արի՛ւ Ես էլ ի՞նչ իրաւունք ունէի՝ պռօշս պռօշիս տամ, կամ բան հարցնեմ, հորթի պէս ետևիցը վազեցի:

—Մտել ենք ձորը, ուռի ծառերի փռնուտներովը (հացառապ) անդադար վերև ենք բարձրանում. ընչանք Մողտու ձորն անցկացանք, մերը մեզ հասաւ, ծառ չ'եղած տեղը կուզէ-կուզ ենք գնում, որ չը լինի՝ թէ ձորի թմրից մի սալգառ տեսնի ու գլխնե-րիս տայ, յետ դարձնի:

—Ել ի՞նչ յետ կը դարձնէին, կը տանէին գեղից դուրս շինած կարախտինումը (կարախտի) մի շաբաթ կը պահէին, օրն երեք անդամ մուկ կը տային: Միտդ չի՞, դժուարն էն էր գեղիցը դուս գալիր, բռնում էին միսակոլով անում:

—Դորա համար մենք չ'լ կու՛ն ու ձիգ անելով, շուաքներիցս վախենալով, խլշկոտալով՝ ոնց եղաւ, մեզ քցեցինք սուրբ Յովհաննէսի աղբիւրը: Կարբեցի երեսէքը գետումը ձուկն էին բռնում. մէրս կանչեց, աքլորի գլուխը կտրել տուեց, կրակ արեց, աքլորը փետրահան արեց, սուրբ Յովհաննէսի իրան զլզլան, զուլալ ջրովը լուաց, լսի պէս սիպոկացրեց. քեզ յայտնի է, փայտէ շամփուր էն տեղ հարիւրներով կայ, գնացողը շինում է, մատաղը խորովում ու քարափի տակին թողում: Մէրս շամփուրն անցկացրեց, խորովեց ու էն տղէքանցն ուտացրեց. խեղճը ոչ ինքը մի կտոր բերանը դրեց, ոչ ինձ մասնաւորեց: Յետոյ երեսէքանցը հեռացրեց, շորերս հանեց, աղբրի ջրիցը օխտը բուււր վրէս ածեց, լեղացրեց:

—Մեռնի՛մ սուրբ Յովհաննէսի զօրութիւնին, էն է՝ կը փրկուէիր էլի՛:

—Իմ երկու ջուխտ, մի կենտ ասլան տղէքանցս անունովն եմ երդուում, ամեն ցաւ ու շուս էն տեղ թողի, 40, 50 տարիներ են գլորուել էն օրից, ի՛նչքան լաւ ու վառ ենք տեսել ու իմ ջանս դող ու էրոցքը չի իմացել՝ ի՛նչ բան է:

—Աղջի՛, դու լսել ե՞ս, ասում են էդ տեղ յառաջ աղբիւր չի եղել:

—Բաս ե՞րբ է դուրս եկել:

—Իմ տատս պատմում էր, թէ սուրբ Յովհաննէսի ժամ շինող վարպետը դողացրել է. մարդը հալուում, ուժից ընկնում է. շինութիւնը կանգնում է: Ժամ շինել տուող վարդապետը շատ գեղ ու դիր է անում, ամեն ժամարարի դողը կապել է տալիս, միաբանքին տէր ողորմեա է չոքացնում, ճար չի լինում. նորա ձեռի գործը Հրեշտկան էլ չեն կարող դուրս բերիլ: Ի՞նչ անի վանահայրը, հօ՛ւ էնպէս փառաւոր տաճարի շէնքը անփորձ մարդկանց ձեռքը չէ՞ր քցիլ, շէնքն ու գեղեցկութիւնը կէս փող չէ՞ր շինիլ. ճարը որ կըտրում է, ուխտ է անում, որ եթէ սուրբ Յովհաննէսն էս դժուարութիւնին մի հեշտ ճանապարհ ցոյց տալ, ինքը մի շաքաթ անսուաղ կը կենայ, մի տարի էլ օրը մի ձեռնաշափ. չոր հացով կ'ապրի: Սուրբ մարդի ձէնն Աստուած կը լսի. հէնց էն գիշերը սուրբ Կարապետը դրան երազ է գալիս, թէ վարպետիգ տա՛ր ձորը, գուշ արած (ի գուշս տնկեալ) քարի տակին մի նոր աղբիւր եմ բղխացրել, նորա ջրից օխտը գաւաթ վրէն լցրո՛ւ, լեղացրո՛ւ, բս՛ր, հանի վանքի գլուխը, թող աշխատի:

—Հէնց էն օրից դէսն էդ աղբիւրը դողի փրկութիւն է:

—Բաս չե՞ս ասում, թէ ի՞նչ քաղցր ջուր է, խմելով չես կըշտանում, մի թխիկ գառը մենակ կեր, էն ջրիցը խմի՛, — կը մարսես:

Այս և սորա նման շատ հրաշքներ են պատմում սուրբ Յովհաննիսի արծաթափայլ աղբրի մասին Արագածոտն գաւառի բնակիչները և, որ գլխաւորն է, ջերմողներից շատ սակաւին չի յաջողիլ դիմել, լողանալ և չ'առողջանալ:

(Կը արունակւի)